



VISCHNAUNCA
DISENTIS I MUSTÉR

Votaziun communal da dils 8 da mars 2026

Realisaziun d'in niev parc da giugs e moviment cun center d'acrobatica a Mustér

Dretg da baghegiar e renunzia dil deivet



I.	Resumaziun	2
II.	Messadi: Realisaziun d'in niev parc da giugs e moviment cun center d'acrobatica a Mustér	4

RESUMAZIUN



Il cussegl da vischnaunca propona unanimamein d'approbar il contract da dretg da baghegiar denter la vischnaunca e las Penderas Mustér cun desister sin la restituziun dil deivert restont dallas Penderas Mustér da frs. 1'750'000.

Ils pli impurtants puncts:



INFORMAZIUNS

Vischnaunca e regiun survegnan ina purschida complementara ch'ei unica per famiglias, affons e giuvenils. Entras quella completaziun dalla purschida existenta el Center Fontauna, daventa igl areal dil Center Fontauna in liug da sentupada singular, in "bischu" e magnet per pign e grond.

La vischnaunca ha la schanza da promover il sport d'acrobatica el cantun Grischun entras metter a disposiziun cundiziuns da basa optimalas. Quei cun il sustegn dall'associaziun d'acrobatica Svizra (Acrosuisse) sco era l'uniun da gimnastica Grischun.



FINANZAS

Ils cuosts d'investiziun ein schazegiai denter 9-10 milliuns francs. Quella investiziun vegn purtada dallas Penderas Mustér.

La vischnaunca ha sulet da desister sin la restituziun dil deivert restont dallas Penderas Mustér SA **da frs. 1'750'000.**

Da quella summa vegn concediu frs. 1'000'000 à fonds perdu sco contribuziun al liug (Standortbeitrag). Frs. 750'000 vegnan scuntrai duront 30 onns (annualmein frs. 25'000) cun la cumpart dalla vischnaunca da Mustér per l'integrasiun dalla purschida ella "Golden Card". La vischnaunca profitecha cheutras, damai ch'ella sa trer giu quella summa mintg'onni dils cuosts dalla "Golden Card" per far diever dil parc da giugs e moviment.

El cass che la "Golden Card" vegn buca pli purschida ed ei dat neginas purschidas equivalentas vegn concediu alla populaziun da Mustér in rabat sin ils prezzis d'entrada dil parc da giugs e moviment cun center d'acrobatica da 50%.

Il tscheins dil dretg da baghegiar importa ad ina summa annuala minimala da frs. 6'781.60. Sur 30 onns dat quei entradas totalas minimalas **da frs. 203'448.**

La vischnaunca da Mustér porta neginas rescas finanzialas.



CONTRACT

El cass d'in retuorn a tschep ordinari ni anticipau (ordentlicher oder vorzeitiger Heimfall) sa vegnir prolungiu il contract, vegnir surpriu igl object ni ch'igl areal sto vegnir reconstruius el stadi oriund sin donn e cuost dallas Pendicularas Mustér.

Tier ina surprida digl object vala:

- Ordinari (sunter 30 onns): senza indemnisiun
- Anticipau: emprems 20 onns 20% dil prezi commercial, davos 10 onns 10%

Las Pendicularas Mustér ein responsablas pil menaschi dil "parc da giugs e moviment cun center d'acrobatica" e s'obligheschan da tener aviert quel duront minimal 270 dis ad onn.

1. Introducziun – Niev parc da giugs e moviment cun center d'acrobatica

Il davos diesch onns ei la vischnaunca da Mustér sesviluppada oreifer. Sper las grondas investiziuns el sector turistic en connex cul Resort Catrina e las pendicularas ha era la vischnaunca saviu investir el svilup ed el futur. Da numnar ein cheu cunzun l'engrandaziun dil Center Fontauna, in'impurtonta investiziun ch'ei gia oz prefinanziada, la Golden Card sco purschida unica per nossas indigenas e nos indigens, la revisiun totala dalla planisaziun locala che metta bunas cundiziuns da basa pil futur, la punt pendenta ch'ei in'ulteriura attracziun per nossa regiun ed igl acquist dalla parcella Hess che duei portar il moviment giavischau amiez nies vitg. La vischnaunca da Mustér ei buca stada eri e duess era buca far quei el futur. Cun perschasiun e plein forza lavura la suprastanza communal vid ulteriuras finamiras per far nossa vischnaunca aunc pli attractiva ed interessanta sco liug da habitar.

Entas il niv hotel Acla da Fontauna sco era il resort a Dieni pren quei svilup en nossa regiun aunc tier. Quei munta ulteriuras plazzas da lavur, ulteriuras entradas da taglia e taxas, ulteriura plivalur pil commerci, mistregn e la gastronomia indigena.

Tut quels aspects influenzeschan positivamein il svilup da nossa vischnaunca.

Nossa vischnaunca duei darentar aunc pli attractiva ed interessanta, cunzun per famiglias giuvnas. La regiun sisum la Surselva dispona gia oz da vastas purschidas per affons e giuvenils el liber (outdoor). Per numnar mo entginas pusseivladads: Ir cun skis, cuorsa liunga, viagià, ir cun patinas, scursalar e curling igl unviern. Duront la stad ballapei, minigolf, tennis, bike e viagià. Cumpletau vegn quella interessanta purschida denter auter cun la scursalera (Rodelbahn).

Davart purschidas da malaura (indoor) dispona la regiun en emprema lingia cunzun da purschidas da sport. Aschia porscha il Center Fontauna actualmein fitness, reiver, bouldrar, badminton e tennis. A Sedrun vegn purschiu in bogn cuvretg cun in wellness public. Mo era las purschidas culturalas sco per exempel ina viseta en in dils museums en nossa regiun ha adina sia valeta. Cun la "Golden Card" ei tut quella purschida accessibla.

Auter vesa ei ora cun pusseivladads ed activitads da divertiment, recreaziun e moviment per affons e famiglias da schliat'aura (indoor). Quellas ein limitadas. La proxima pusseivladad en quei connex ei il Rufalipark si Sursaissa. Per megliar quella munconza duei vegnir construì sigl areal dil Center Fontauna in niv parc da giugs e moviment cun integrar en quel in center d'acrobatica. Quei sco cumpletaziun dalla purschida existenta, cunzun da sport, el Center Fontauna.

Igl areal dil Center Fontauna d'aventass entras quella purschida supplementara vasta e particulara per affons, giuvenils e famiglias tier in «bischu» che fuss unics lunsch sur la regiun ora.

Era per nos hosps da vacanzas e secundas habitaziuns eis ei grev da porscher ulteriuras activitads per dis ch'igl ei buca adattau da far diever dallas purschidas el liber. Gia dapi entgins onns fa la vischnaunca ponderaziuns co meglierar quella situaziun. Igl engrondiment e la renovaziun dil Center Fontauna ei stau in emprem pass en quella direcziun. A Sedrun la sanaziun dil bogn cuvretg cun la nova ruschnera. Mo gest en in onn da pauca neiv, sco igl ei stau uonn il cass, fuss ina purschida da giugs e moviment en nossa vischnaunca resp. ella regiun stada optimala. Era igl investur e president dallas pendicularas Marcus Weber ei pertscharts da quella situaziun e vul porscher maun.

Plinavon ei l'acrobatica d'aventada in'impurtonta sparta da sport per affons e giuvenils ella regiun. La grupp d'acrobatica dall'Uniun da gimnastica Cadi ei la suletta grupp el Grischun che separticipescha a concurrenz d'acrobatica. En Svizra existan actualmein treis centers regiunals da prestaziun d'acrobatica. Cun l'activitad el sector dall'acrobatica havess Mustér la pusseivladad da daventar il quart center regional d'acrobatica. L'Associaziun d'acrobatica svizra (Acrosuisse) sustegn medemamein quei intent. Persuenter basegna ei denton ina localitad da trenament cun in plantschiu special per quei sport.

La munconza da purschidas da malaura en nossa regiun per indigens e hosps da vacanzas, cunzun en connex cun divertiment e moviment sco era las pusseivladads en connex cun l'acrobatica, ha mumentau la vischnaunca da perseguitar in project corrispundent e dad aschia planisar in niev baghetg sigl areal dil Center Fontauna per exact quels basegns. Quei en stretga collaboraziun cun igl investur Marcus Weber.

Nossa vischnaunca ha pia la caschun unica da seposiziunar el futur cun quei project singular, e cunzun cuagl areal Center Fontauna, sco liug da habitar fetg attractiv sisum la Surselva.

2. Project


Ord l'intenziun duei vegnir realitad. Aschia ha la suprastonza communal lantschau la primavera vargada il project e schau elaborar, en concordanza cun las Pendicularas Mustér, in studi per in parc da giugs e moviment, per silsunter mirar co perseguitar vinavon e concretisar in eventual project.

Aschispert sco la studia ei stada sin meisa han giu liug ulteriurs discuors denter vischnaunca e Pendicularas Mustér ed il project ei vegnius sviluppaus vinavon. Duront quei temps ei era l'ugc, l'unìun da gimnastica Cadi, sedrizzata enviers ils responsabels cun l'idea da far ponderaziuns, sch'ins savess e vul buca integrar in center da trenament d'acrobatica en quei niev object. Quei input ei vegnius perseguitaus vinavon e la fin finala integraus el project. Quei denter auter, mo cunzun era ord il motiv, ch'igl areal sper la sala Fontauna ei ideals per la realisaziun d'in eventual center d'acrobatica. Quei era muort las installaziuns sanitaras ch'ei gia avon maun san vegnir nezegiadas.

Cheusut entginas impressiuns davart plans ed exempels da pusseivlas purschidas. Il project vegn perseguitaus vinavon e luvraus ora en detagl sche la cuminonza da votantas e votants dattan suatientscha alla fatschenta a caschun dalla votaziun all'urna dils 8 da mars 2026.

Plan da situaziun


Il niev object (stgir tgietschen) ei previus visavi la sala Fontauna e sur la piazza da ballapei. Aschia san ins senezegiar optimalmein dallas installaziuns sanitaras existentas. Era han ins ina biala survesta silla piazza da ballapei ed enviers la Surselva. Las installaziuns sanitaras vegnan aschia nezegiadas el futur duront igl entir onn. Igl access tier il niev baghetg succeda sur il plaz tgietschen cun agid dad ina passerela.



Plaunterren / entrada

Sil plaun terren (lev pli stgir grisch) ei previu purschidas per affons pigns sco era in liug da sentupada pils geniturs.


Sil plaun terren vesan ins directamein sil plaun sutterran, nua ch'ils giuvenils san far termagls.



Plaun sutterran

Il plaun sutterran ei cumbinaus cun las installaziuns sanitaras ch'ein gest visavi.

El vest sesanflan las pusseivladads da termagliar pils giuvenils. Egl ost il plantschiu pils trenaments d'acrobatica, il qual sa era vegnir duvraus dad affons e giuvenils.



Visualisaziun 1



Visualisaziun: Studio UH architects ETH

Visualisaziun 2



Visualisaziun: Studio UH architects ETH

La porschida ei buca aunc definida en detagl. Suandont entginas pusseivladads interessantas ed attractivas per affons e giuvenils che savessen far part dalla porschida (fotos ein exempels d'auters loghens).

Trampolins e ruschneas



Termagliar e divertiment per affons pigns



3. Center d'acrobatica

L'idea "dall'acrobatica gimnastica Cadi" d'integrar in center da trenaments per acrobatica el project ei vegnida persequitada vinavon ed ei oz previda da realisar el niev object. L'uniun da gimnastica Cadi cun la gruppa d'acrobatica da Sedrun entochen Flem ei pil mument la suletta el cantun Grischun che fa quei sport cumpetitiv (Wettkampf). La gruppa d'acrobatica exista dapi la stad 2022 sco representanza uffiziala dil cantun Grischun tier cumpetiziuns che han liug ell'entira Svizra. La gruppa d'acrobatica trenescha actualmein rodond 3-4 gadas ad jamna tier nus a Mustér el Center Fontauna ni ellas localitads dalla Claustra Mustér e ha gia contonschiu entginas medaglias tier diversas occurrenz. Ils responsabels dall'uniun e dalla gruppa acrobatica vulan promover il sport ella regiun ed el cantun Grischun e sustener ils giuvenils che han motivaziun e plascher da far quei sport da contonscher lur finamiras.

Ils trenaments vegnan actualmein fatgs sin mattas singulas, quei ch'ei buca ideal. Plinavon tonscha il diember da mattas buca per crear in plantschiu adattau per far trenaments cumpetitivs. Per saver sesviluppar vinavon, far buns trenaments sco era pil bien dalla giugadira ei in plantschiu cun las grondezias per occurrenzas cumpetitivas necessaris. Cun in tal plantschiu e cun grond sustegn davart l'associaziun d'acrobatica Svizra (Acrosuisse) sco era davart l'uniun da gimnastica Grischun, sa vegnir creau igl emprem center d'acrobatica el cantun Grischun. L'uniun da gimnastica Grischuna ei lundervi da far pli enconuschents il sport d'acrobatica el cantun Grischun.

El cass che la populaziun dat suatientscha alla votaziun all'urna vegn l'uniun da gimnastica Cadi cun la gruppa acrobatica, ensemen cun las uniuns cantunalas, ad elaborar in concept adattau per promover il sport d'acrobatica el cantun Grischun entras il niev center a Mustér.

Cun il project ch'ei avon maun havein nus la schanza da promover quei sport entras metter a disposiziun cundiziuns da basa optimalas. La vischnaunca da Mustér savess aschia s'establi ella sparta d'acrobatica e segidar da far enconuschenta quella.

Suandont entginas impressiuns digl emprem campinadi Grischun da gimnastica d'acrobatica tier nus a Mustér el Center Fontauna:

Atletas muossan tgei ch'ellas han empiu durant ils trenaments



Cun l'infrastructura ch'ei avon maun eis ei pusseivel da trer ulteriurs campinadis Grischuns a Mustér. En Svizra existan actualmein sulettamein treis centers regionalis da trenament per acrobatica (Winterthur, Wil e Genevra). Il center d'acrobatica pertucca in'atgna sparta da sport ed ei era negina concorrenza per l'academia da freestyle a Laax.

Impurtont da saver: Ils trenaments han pli u meins mintgamai liug las seras durant l'jamna. Quella surfatscha stat libra durant il di, respectivamein las fin d'jarnas pils affons e giuvenils per termagliar (quei ei stau cundiziun). Per quell'intenziun vegn mess a disposiziun materials da far termagls sin il plantschiu. Cheu divers pusseivels elements per far termagls ni per il sport da «Parkour»:

Utensils per piazzament temprar



4. Credit concediu igl onn 2016

Ils 27 da november 2016 ha il suveran da Mustér, sin proposta unanima dil cussegl da vischnaunca, concediu cun 68% consentiment (participaziun 79%) in emprést allas Penderas Mustér per la colligaziun Sedrun-Cungieri-Parlet. Igl emprést da frs. 2.5 milliuns vegn tscheinsius ed amortisauz enteifer 20 onns cun impurtar el cudisch funsil in dretg da pègn.

La vischnaunca da Mustér ei separticipada igl onn 2016 vid ulteriurs projects turistics, seigi quei cun ina contribuziun tiel project d'ennevar ni cun ina garanzia da defizit. Tenor messadi ein ils motivs persuerter stai la realisaziun dil Resort Catrina ed ulteriuras purschidas turisticas.

Igl investur dallas Pendicularas Mustér, Marcus Weber, ha teniu plaid. Dapi ch'el ha surpriu las Pendicularas Mustér igl onn 2014 sco acziunari principal e dapi che la decisiun dalla populaziun ei vegnida prida igl onn 2016 ha igl investur realisau tuttas investiziuns previdas ed aunc empau dapli. Cheu ina resumaziun dils projects realisai ni aunc en realisaziun:

- Resort Catrina
- Renovaziun hotel Catrina (antruras Hotel Baur)
- Realisau las ustrias "Pizzeria Stiva Ursus" e "Steak House Chevrina" ed il tschaler da vin "La Cantinetta"
- Surpriu la Catrina Lodge (antruras Hotel Sax)
- Realisau la pendiculara Sedrun-Cuolm da Vi
- Realisau in casa da parcar per rodund 440 autos
- Realisau ina nova ustria «Parvis» sil cuolm da Vi
- Sanau l'ustria a Caischavedra
- Realisau il Bike Flow Trail a Gendusas
- Investau en indrezs da far neiv artificiala
- Realisau ina scursalera a Caischavedra (Rodelbahn)
- Segidau cun l'investiziun ella punt pendenta

Ulteriur ei previu:

- Remplazzament dalla sutgera Parlet
- Davosa etappa d'ennevar
- Engrondaziun dil resort Catrina
- Partenari tier l'investiziun egl indrez solar alpin "Magriel"

Igl investur ed acziunari principal dallas Pendicularas Mustér ha aschia investau dapli che frs. 130 milliuns en nossa vischnaunca e per nossa regiun.

Quellas investiziuns genereschan per la vischnaunca entradas supplementaras da taglia e taxas. Era las entradas indirectas e la plivalur pil commerci, mistregn e la gastronomia indigena entras lavurs, cumpras e consum dallas pendicularas resp. dils/dallas collaboratur(a)s ein buca da sutschazegiar.

Ultra da quei ei nossa vischnaunca e l'entira regiun vegnida pli attractiva per persunas indigenas e hosps.

5. Finanziaziun dil niev parc da giugs e moviment cun center d'acrobatica

Il parc da giugs e moviment cun center d'acrobatica vegn finanziaus e baghegiaus dallas Pendicularas Mustér. La summa totala dall'investiziun schai tier rodond 9-10 milliuns francs. Igl ei previu che la vischnaunca da Mustér separticipeschi vid ils cuosts d'investiziun, cun quei ch'igl ei in project communabel che duei dar in augment d'attractivitat ed ina plivalur per nossa vischnaunca e la region.

Ellas contractivas cun igl investur ein ins secunvegna che la vischnaunca sto sulettamein desister sigl emprést restont dil credit da frs. 2.5 milliuns, ch'ei vegnius concedius igl onn 2016 per la colligaziun Sedrun-Cungieri-Parlets.

Dapi che la decisiun ei vegnida prida igl onn 2016 ei igl emprést vegnius pagaus anavos annualmein cun frs. 125'000 (cuoz total 20 onns). Igl emprést, che secumpona ord duas parts, ei sesviluppau suandontamein:

Emprést da 1.32% tscheins, frs. 1'750'000	
Altezia deivet all'entschatta, onn 2018	<u>frs. 1'750'000</u>
Pagaments d'amortisaziun 2019-2024 (6 onns)	- frs. 750'000
Deivet net pils 31.12.2025	frs. 1'000'000
Emprést da 1.05% tscheins, CHF 750'000.-	
Altezia deivet all'entschatta, onn 2019	frs. 750'000
Neginas amortisaziuns	
Deivet net pils 31.12.2025	frs. 750'000

Aschia han las pendicularas Mustér pigl 1.1.2026 tier la vischnaunca da Mustér in deivet restont da **frs. 1'750'000**, sin il qual ei vegn desistiu. La vischnaunca sto per quei niev baghetg pia buca conceder in credit, mobein desista sulet sin annualmein frs. 125'000 liquiditad resp. totalmein 1'750'000.

Da quella summa vegn concediu sulettamein frs. 1'000'000 à fonds perdu sco contribuziun al liug (Standortbeitrag). Ils auters frs. 750'000 vegnan scuntrai durant 30 onns (annualmein frs. 25'000) cun la cumpart dalla vischnaunca da Mustér per l'integraziun dalla purschida ella "Golden Card". La vischnaunca profitescha cheutras, damai ch'ella sa trer giu quella summa mintg'onn dils cuosts dalla "Golden Card" per far diever dil parc da giugs e moviment.

La renunzia dil deivet sco tal ha aschia negina influenza sin il quen da gudogn e sperdita dalla vischnaunca.

Davart ina restituziun dils tscheins hipotecars vegn desistiu e mirau d'amortisar las duas hipotecas ton pli spert.

6. Contract dretg da baghegiar cun Pendicularas Mustér

Per la parcella nr. 1351, cun ina surfatscha da 692 m², vegn concediu in dretg da baghegiar. Il contract da dretg da baghegiar denter la vischnaunca da Mustér e las Pendicularas Mustér SA cuntegn las reglamentaziuns en connex cun la realisaziun dil project.

Cuort e bein ils 10 pli impurtants puncts:

- 1) Il contract ha in cuoz da 30 onns (2026-2057).
- 2) La valetta dil terren da 692 m² mess a disposiziun ei fixada sin frs. 280/m². Quei munta in total da frs. 193'760.
- 3) Il tscheins pil dretg da baghegiar sedrezza suenter il tscheins da referenza hipotecar cun in supplement d'ina rendita dil capital agen da 2%. Il tscheins minimal importa a 3.5%. Aschia resultescha in tscheins annual da minimalmein frs. 6'781.60. Sur 30 onns total frs. 203'448.
- 4) Retuorn a tschep ordinari (ordentlicher Heimfall):
 - a. Ins secunvegn da prolungir il contract.
 - b. Reconstrucziun dil stadi oriund sin donn e cuost dallas Pendicularas Mustér SA.
 - c. Surprender igl object senza stuer pagar in'indemnisaziun pil baghetg.
- 5) Retuorn a tschep anticipau (vorzeitiger Heimfall):
 - a. Onns 1-20 (emprems 20 onns): Surprender igl object cun in'indemnisaziun da 20% dil prezi commercial da lu temps.
 - b. Onns 21-30 (davos 10 onns): Surprender igl object cun in'indemnisaziun da 10% dil prezi commercial da gliez temps.
 - c. Prolungir il contract sut autras cundiziuns.
 - d. Reconstrucziun dil stadi oriund sin donn e cuost dallas Pendicularas Mustér SA.
- 6) Las Pendicularas Mustér ein responsablas pil menaschi dil parc da giugs e moviment che s'obligheschan da tener aviert quel duront minimal 270 dis ad onn.

- 7) La vischnaunca da Mustér desista sin la restituziun dil deivet restont dad frs. 1'750'000.
 - a. Frs. 1'000'000 à fonds perdu sco contribuziun da liug digl object (Standortbeitrag).
 - b. Frs. 750'000 vegnan scuntraì durant 30 onns (annual frs. 25'000) cun l'indemnisaziun dalla vischnaunca da Mustér per l'integraziun dalla purschida ella "Golden Card".
 - c. El cass che la "Golden Card" vegness buca pli purschida ed ei dat neginas purschidas equivalentas, vegn concediu alla populaziun da Mustér in rabat sin ils prezzis d'entrada el parc da giugs e moviment cun center d'acrobatica da 50%.
- 8) La vischnaunca da Mustér desista sin ulteriuras pretensiuns en connex cun tscheins hipotecars. Ils dus credits vegnan pagai anavos aschi spert sco pusseivel.
- 9) Igl access tier las installaziuns sanitaras dil plaz da ballapei/glatsch ei da tut temps garantius.
- 10) La realisaziun dalla construcziun dil baghetg ha d'entscheiver sil pli tard in onn suenter ch'il contract da dretg da baghegiar ei vegnius suttascrets.

Il contract dil dretg da baghegiar ei previus da suttascriber immediat suenter la votaziun all'urna dils 8 da mars 2026, en cass che la populaziun dat suatientscha alla fatschenta. Silsuenter vegnan la damonda ed il project da baghegiar preparai. L'auter onn ei previu d'entscheiver cun las empreras lavurs da construcziun.

7. Ponderaziuns finalas

Nossa vischnaunca ha cun quei project, en stretga collaboraziun cun las Pendicularas Mustér, la schanza unica da realisar sigl areal dil Center Fontauna in niev parc da giugs e moviment cun integrar en quel in center d'acrobatica. Il contract da dretg da baghegiar garantescha a nus gronda segirtad. La vischnaunca porta neginas rescas (ni da menaschi ni d'in eventual baghetg che stat vit). Per in project da rodond 9 milliuns francs sto la vischnaunca sulet desister sin liquiditad da frs. 1.75 milliuns. Plinavon vegn la populaziun da Mustér – grazia allas contractivas e la bunaveglia dallas Pendicularas Mustér – a profitar da quella purschida entras l'integraziun ella Golden Card (cun annualmein frs. 25'000) ni cun in rabat da 50% sils prezzis d'entrada dil parc da giugs e moviment cun center d'acrobatica.

Per nossas famiglias, pils affons e giuvenils d'aventass igl areal dil Center Fontauna in liug da sentupada singular. Cun tut sias purschidas in magnet per pign e grond, per indigen e hosp, per beadis, tats e tattas, semplamein in liug unic cun grond moviment. Tut en tut in liug ideal, cun avunda parcadis e bia plaz. Ina gronda schanza per nossa vischnaunca e per la regiun.

8. Proposta

Sin fundament dallas ponderaziuns suramenziunadas propona il cussegl da vischnaunca unanimamein d'approbar il contract da dretg da baghegiar denter la vischnaunca e las Pendicularas Mustér cun desister sin la restituziun dil deivet restont dallas Pendicularas Mustér da frs. 1'750'000.

En num dil cussegl da vischnaunca

La presidenta:

Igl actuar dil di

Theres Burri Gadola

Ervin Maissen

Disentis/Mustér, ils 29 da schaner 2026